

## Buca schau stermentar digl impediment

Il Center Aua Viva a Mustér muossa il mument in'exposiziun cun ovras da *Victor Bisquolm* (74). Igl artist ch'ei ligiaus vid la sutga da rodas dapi 1966, ha luvrau ils davos onns cun differentas tecnicas e stils. El malegia, creescha sculpturas e plasticas. Duront sia dimora ell'Australia che ha cuzzau rodund 20 onns, ha el studiau art ed ei seperfectiunau leu en differentas direcziuns avon che returnar 2001 ell'Europa Centrala. Sias ovras ein stadas da veser en pliras tiaras. La pli grond'exposiziun ei bein stada quella dil 2005 el Center da paraplegia a Nottwil. Avon in onn eis el returnaus en siu vitg a Mustér. (fmr/hh) **Pagina 3**

## Returnaus el vitg nativ cun in tschuppel interessantas ovras

Il destin ha menau Victor Bisquolm ell'Australia. Leu eis el seprofundaus egl art. Suenten in'ulteriura dimora pli liunga ella vischinonza da Berlin eis el returnaus a Mustér nua ch'el ei naschius. Aschi extraordinaria sco sia veta ei stada, ei era sia collecziun d'ovras. Ina part da quella ei exponida il mument el Center Aua Viva a Mustér.

HANS HUONDER/FMR

Ella vegliadetgna da 16 onns ha *Victor Bisquolm* giu in grev accident cun skis el territori da Laax nua ch'el era engaschus professionalmein. El ha rut il dies ed ei restaus paraplegics: «Ils miedis havevan dau a mi aunc rodund 15 onns.» Naven da quei tragic eveniment igl onn 1966 eis el staus egl jester. Igl emprem per spitals entuorn, lu a Basilea, Biel e Zug. El ha empriu d'urer. Miez dils onns 1980 ein el e sia consorta sesperti. «Lu hai jeu vuliu ir aschi lunsch naven sco mo pusseivel. Jeu sun lu setschentaus ell'Australia», seregorda igl um ella vegliadetgna da 74 onns ch'ei carschius si en ina fetg gronda famiglia a Mustér. Suenten treis meins ha el prolunghiu il visum e la fin finala – pia suenter sis meins – eis el sedecidius da studiar art ella vischinonza da Melbourne: «Sch'jeu havess buca fatg quei, havess jeu stuiu bandunar la tiara.» Per insumma saver far il studi ha el stuiu emprender engles da funs ensi, denter auter en ina canorta d'affons. Suenten il studi da sis semesters eis el staus engaschus egl art: ord ses mauns ein vegni maletgs



da different stil, sculpturas e plasticas. En quei temps eis el era daventaus burgheis dall’Australia.

2001 ei Victor Bisquolm returnaus ell’Europa e ha viviu rodund 22 onns sper Berlin avon che returnar a Mustér: «Igl ei adina stau mia finamira da vegnir anavos en miu vitg nativ.» Dapi in onn viva el en ina habitaziun da cumproprietad el vitg claustral, leu nua ch’el ha passentau si’affonza.

### Differents stils

Tgi che viseta l’exposiziun da sias ovras el Center Aua Viva a Mustér/Raveras – ella cuoza entochen ils 20 da november 2022 – daventa beinspert pertscharts dil grond spectrum da tecnicas e stils da s’exprimer da Victor Bisquolm. Da veser ein picturas da cuntradas e subjects abstracts, maletgs cun puncts tenor la tecnica dils Aborigines, mo lu era sculpturas ord bronz, crap scalegl, lenn e tiaracotga. S’entelli ch’igl ei ina pintga part da sia lavur sur bunamein quater decennis, mussadas en varga 100 exposiziuns surtut ell’Australia, la Tiaratudestga e la Svizra.

2005 ha el mussau buca meins che 120 ovras el Center da paraplegia a Nottwil. Quei seigi stau sia pli grond’exposiziun. «Il pli bugen s’exprimel jeu en ina fuorma abstracta. Mes motifs varieschan denton era da temps en temps. Ei ha dau temps ch’jeu sun, en mias pic-

**Dapi 1966 ei Victor Bisquolm ligiaus vid la sutga da rodas. Tonaton eis el plein energia e fetg engaschaus en sia lavur d’art.**

FOTO HANS HUONDER

## «Igl ei adina stau mia finamira da vegnir anavos en miu vitg nativ.»

Victor Bisquolm, artist

turas, era sefatschentaus fetg dalla mort», di Victor Bisquolm che haveva endrizzau ell’Australia in grond atelier d’art. Da quella fasa ei da veser nuot a Mustér/Raveras, persuerter ovras ch’inspireschan e laian al contemplader il spazi d’interpretaziun. Savend che sias empremas lavurs eran pictura purila e naiva, ei il spectrum da sias ovras oz tonpli remarcabels.

### Sescolaus cuntinuadamein

Victor Bisquolm ei buca restaus lischents en sia perfecziun ed en quella ha el stuiu surmuntar bein enqual ga siu disavantatg d’esser ligiaus vid la sutga da rodas: «Sch’jeu füss s’annunziaus per exempel all’academia d’art da stad a Salzburg sco um en sutga da rodas, füss jeu mai vegnius risguardaus. Aschia hai jeu fatg mi’annunzia sco tut ils auters era, e cu jeu sun staus leu, han ein strusch pli saviu tarmetter a casa mei.» El hagi acceptau il destin cumbinaus cun enqual handicap, magari cun dar culs cumbels. Aschia ha el era luvrau cun blocca da crappa d’entochen 20 tonnas e creau ord quella sculpturas. «2004 hai jeu astgau far ina sculptura per l’anteriura ministra tudestga per lavur e fatgs socials, Regine Hildebrandt», seregorda Victor Bisquolm cun fatscha cuntenta. Biaras da sias ovras han anfflau la via en exposiziuns e pliras ga ha el regalau il recav dalla vendita da quellas per ina buna causa: «Ina ga ei quei stau per favur d’affons, in’altra ga per la perscrutaziun dil cancer.» Ils biebein 20 onns da sia dimora en Tiaratudestga ha el instruiu art en differentas instituziuns e scolas. Uss eis el da retuorn a Mustér e cun el in’interessanta exposiziun da sias ovras.